



Gabinete Wever - Croes II

# ISLA ((•)) NLINE

Dialuna 21 Februari 2022

Email: [IslaOnline@gobierno.aw](mailto:IslaOnline@gobierno.aw) Tel: 528-4952

## NOTICIA DI GOBIERNO

20  
22

AÑA DI  
INVERSION Y  
OPORTUNIDAD







# **PROME MINISTER A SCOGI REGALONAN DI COMPANIANAN LOCAL PA OBSEKIA SECRETARIO DI ESTADO VAN HUFFELEN**

## **E empresarionan ta splica di nan productonan**



Prome Minister Evelyn Wever - Croes ta splica e inspiracion tras di escogencia di regalonan cu a obsekia Secretario di Estado Alexandra van Huffelen durante su bishita na Aruba. Sra. Van Huffelen a expresa di keda sumamente contento cu e regalonan y a aprecia esakinan masha hopi.

Pa locual ta e set di marca "Ha'bon" ta trata di productonan di compania local cu ta traha cu personanan cu limitacion. Bunita di e compania aki ta cu e ta promove inclusion di tur persona den comunidad, cual ta algo cu Gabinete Wever - Croes II ta sostene. Ademas di esaki, e compania ta brinda productonan di super bon calidad.

E otro obsekio cu a regala sra. Van Huffelen ta un bunita sjaal di diseñador local Gigila Gomez. Un diseño di un coleccion inspira pa 'biento', nos colornan di bandera y nos hendenan local. Tur esaki refleha door di un diseño colorido y Caribense.

### **"Biento"** by Gigliola Gomez

Venir de un país como Aruba, es una mezcla de olores, arena y sol lo que mas inspira a los Arubianos es el viento acogedor con el que acaricia mente, cuerpo y Alma.

Es mostrar una cultura que se remonta en un viaje sensorial desde sus primeros habitantes cuando llegaron a conquistar la isla con la magia de sus veleros.

El mismo viento que hizo llegar el desarrollo económico, cultural y social en la isla uniendo a todos aquellos que llegaron aquí de las cuatro esquinas del viento y que desde ese día consideraron a "ONE HAPPY ISLAND" como su hogar.

Aquí en la isla Gigliola Gómez entrelaza su historia por la moda siendo la cuarta generación de su familia que practica el arte de moda donde ella desde niña sintió el viento acariciando su piel mientras exploraba su isla natal.

Es el mismo viento que hoy la inspira para traer su nueva colección de pañuelos y bufandas basadas en los colores de su bandera.

"Biento" representa la Brisa que cubre la isla de Aruba la cual hace que se entrelacen los colores creando una fusión única entre los habitantes. También la cual refleja la armonía e inclusión, que existe en el día cotidiano de los Arubianos y la gente que nos visita.



## Continuacion PROME MINISTER A SCOGE REGALONAN DI COMPANIANAN LOCAL....



### PRODUCTONAN DI CUIDO MARCA HA'BON

Naline Heilbron ta splica cu Ha'bon ta un compania di productonan traha na man na Aruba door di personanan cu limitacion. Sra. Heilbron ta splica cu e momento cu el a ricibi yamada di Prome Minister Evelyn Wever - Croes, cu e peticion pa un regalo special pa e bishita internacional aki, tabata un momento yena cu orguyo.


'Ha'bon Aruba, no ta unicamente habon. Como cu e demanda a cuminsa crece, e mercado tambe a cuminsa crece. Nos a cuminsa aventura exitosamente den otro ramonan di cuida di cuero 'skin care', a base natural cu ingredientenan natural.'

E regalo cu a scoge ta uno edicion limta, traha cu champaña. Y ta un promedio di 60 dia pa e madura pa e yega na e mihor PH pa bo cuero, cabei y henter curpa. Tambe a scoge full e liña di colageno, elastina hyaluronic acid como parti di e regalo, sra. Heilbron a splica. Dene cahita cu tambe ta wordo traha na man pa personanan cu limitacion, ta inclui un carchi cu tur historia di con ta traha e producto y e team cu ta tras di e productonan. 'Ta orguyoso di e oportunidad y contento cu Prome Minister a scoge productonan di Aruba, pa haci un entrega na un persona hopi importante. Ta sigur cu tur locual cu a traha y cu a obsekia ta sali for di curson y cay na bon tera.'

### SJAAL DI GIGIOLA GOMEZ

Diseñadora local Gigiola Gomez tambe a expresa cu como Arubiano e ta orguyoso di a haya e oportunidad pa a traves di Prome Minister, scoge un regalo pa Secretario di Estado van Huffelen. 'Arubianonan tin hopi talento y mester support esaki. Prome Minister sigur a haci un bon impresion.'

Sra. Gomez a sigui splica cu e inspiracion tras di sjaal escogi ta nos cultura. 'Mi a wordo inspira como cu Aruba ta trece hopi hende cerca, diferente nacionalidad cu ta trece desaroyo pa nos pais. Mi ta kere nos hendenan ta nos personanan clave y mester sostene otro. Mi a inspira tambe no solamente pa hendenan, pero tambe e biento cu ta supla nos bandera



nacional. E sjaal tin e print di colonan di nos bandera y e movimiento di biento cu ta trece tur hende hunto.'

Sra. Gomez a keda hopi contento cu Prome Minister ta considera nos Arubianonan pa trece algo asina dilanti, pa intruduci hendenan internacional articulonan tipico, autentico y cu tin un storia di conta di nos cultura. Tur Arubiano tincu uni y empodera otro pa nos por yega internacional. Pa esaki, colaboracion ta hopi importante', sra. Gomez a termina bisando.





# TRASH TO CASH SU Q&A TA TRECE E CONOCIMIENTO DI NOS DESPERDICIO NA CLA



Durante siman cu a pasa por a mira riba rednan social diferente video unda ta puntra ciudadanonan over kico nan sa di nos desperdicio aki na Aruba.

Un segmento sumamente interesante cu por wak via e pagina social di "Trash to Cash" Waste Management Solutions. E meta tras di esaki ta pa informa y educa nos comunidad di e diferente tipo di desperdicio, maneranan di procesa esaki y diverso uzo pa e materialnan procesa cual varios compania ya caba ta utiliza.

Di parti di gobierno ta importante pa stimula mas negoshi pa explora e balor cu e materialnan procesa di reciclahe por tin, pa asina tambe mas por participa na e solucionnan grandi den Aruba su maneho di desperdicio.

Tur esaki ta en conexion cu e fecha di 22.2.2022 unda cu Minister di Naturalesa, Sr. Ursell Arends, lo anuncia kico ta e idea tras di di "Trash to Cash" Waste Management Solutions y con ta mira e proximo pasonan den e proceso di mehoracion di nos maneho di desperdicio.

Keda pendiente pa mas di e Q&A den e dia nan binidero unda cu lo puntra mas ciudadanonan riba caya nan conocimiento over di nos maneho di desperdicio aki na Aruba.








**Den un Cas di Cultura completamente yen cu fanaticonan grandi y chikito**

## **MINISTER DI CULTURA TA ENTREGA RECONOCIMIENTO NA JANIRO EISDEN PA SU 30 AÑA DEN FARANDULA**



Diabierna cu a pasa, Minister Xiomara Maduro di Cultura, den nomber di Gobierno di Aruba, un duna un reconocimiento na Janiro 'Ataniro' Eisdén en conexion cu su 30 añanan den farandula.

Tabata un anochi unico cu a hiba tur esnan presente bek den tempo. E anochi a cuminsa cu un documentario cu a conta di con Janiro a cuminsa y tambe a ilustra tur esnan cu a contribui na formacion di e artista cu e ta awe. Despues a sigui cu Popcorn Dancers cu a baila riba diferente cantica di Janiro, sigui pa un sketch di Gang di Arte. Entre e presentacion nan aki, minister Maduro a tuma un momento pa subi e tarima di Cas di Cultura pa asina entrega un reconocimiento na Janiro Eisdén cu tin 30 aña den farandula, cantando canticanan den nos dushi idioma di Papiamentu. Minister Maduro a elogia 'Ataniro' pa su forma di rima, di canta pero tambe pa su contribucion valioso na nos lenga materno. E anochi a finalisa cu un concierto di 'Ataniro' caminda cu el'a presenta su canticanan di mas conoci, dunando e publico nostalgia di canticanan cu tabata hit durante ultimo



30 aña.

Minister Maduro ta gradici Departamento di Cultura y tur esnan cu a contribui na e anochi aki y cu a haci'e uno unico yena cu creatividad, pero mas importante, dunando honor na un artista cu sin duda tin un aporte grandi na e arte di musica cu ta parti di nos cultura.



# NA SETAR A TREK LOT PA E SECUENCIA DI GRUPO PA E PARADA NACIONAL DI LUZ



Diabierna atardi den presencia di Minister di Cultura Sra. Xiomara Maduro, Minister di Turismo Sr. Dangui Oduber, Director di Setar Sr. Roland Croes, Presidente di Comision Celebracion Dianan Nacional Sr. John Flemming, Sra. Edwina Werleman di Stichting Musica y representantenan di gruponan a tuma luga trekmento di lot pa locual ta e secuencia cu e gruponan lo presenta den e Parada Nacional di Luz otro siman diasabra 26 di februari 2022. Esaki a wordo cubri tambe pa medionan di prensa.

Cada representante di grupo por a scoge un banderín di Aruba y na cada banderín tabata tin un envelop y den esaki e number di cada grupo. Minister Xiomara Maduro a invita e pueblo pa ban uni, sea participa den e parada, admira na banda of sigui esakinan via television of demas medio.

E secuencia ta lo siguiente, e prome grupo cu lo habri e Parada Nacional di Luz ta Pink for Life cual lo wordo acompaña pa Le Groove, e di dos grupo lo ta Dushi Carnival Group cu lo wordo acompaña pa Upgrade Music & Jeon, di tres grupo lo ta Infinity Carnival Group cu lo wordo acompaña pa D'-licious, di cuater grupo ta Royal Carnival Group cu lo wordo acompaña pa NBO, di 5 grupo lo ta Majestic Carnival Group cu lo wordo acompaña pa Youth Xtreme y e ultimo grupo lo ta Empire Carnival Group cu lo wordo acompaña pa Buleria. Un total di 6 grupo y 6 banda cu lo subi caya dorna na luz di colornan di nos bandera y pone ambiente pa asina nos drenta nos luna cultural pa celebra Dia di Himno y Bandera.

Un invitacion ta bay na tur esnan interesa pa participa pa tuma contacto cu nan grupo di preferencia y asina inscribi y participa den e parada di luz nacional aki. Un danki ta bay na nos compania di telecomunicacion nacional SETAR NV pa semper ta sostene nos actividad y celebracionnan cultural nacional.





## PARADA NACIONAL DI LUZ

**26 FEB | 2022 | 8 PM-2 AM**

RUTA: ARUBA ENTERTAINMENT CENTER - VONDELAAN  
L.G. SMITH BOULEVARD - EX DOW

### SECUENCIA OFICIAL

- PINK 4 LIFE CARNIVAL GROUP
- LE GROOVE
- DUSHI CARNIVAL GROUP
- UPGRADE MUSIC & JEON
- INFINITY CARNIVAL GROUP
- D'-LICIOUS
- ROYAL CARNIVAL GROUP
- NBO
- MAJESTIC CARNIVAL GROUP
- YOUTH XTREME
- EMPIRE CARNIVAL GROUP
- BULERIA

CHIKITO Y SIMPEL BO POR TA,  
PERO SI RESPETA






GOBIERNO DI ARUBA





## A TREK LOT PA ARUBA SU PARADA NACIONAL DI LUZ NA SETAR



Minister masha contento a anuncia un Parada Nacional di Luz cu ta bai door. E evento grandi aki ta conforme Aruba su Exit Strategy pa bolbe bek na normalidad. Tur medida a wordo elimina pa por bolbe bek na normalidad. Parti di bolbe bek na normalidad ta cu tur actividad cu tawata wordo organiza prome cu Covid, lo por wordo organiza bek awor.

Aruba a tuma un curashi pa organiza un parada di carnaval. Por mira tambe cu mundialmente tur pais na mundo ta flexibilizando nan medida nan of kitando nan por completo. Den cuadro di e parada aki, nos a bin ta asercando tur compania estatal pa wak si nan por contribui, manera nan ta contribuyendo mas cu 10 aña caba pa cu e celebracion di cultura mas grandi di Aruba cu ta carnaval. Diferente compania estatal a duna indicacion cu nan ta participando y lo yuda tambe cu e celebracion cultural aki.

T e awor nos tin ATA, SETAR y tambe AAA cu lo ta yudando Aruba pa na un manera responsabel nos tur por celebra. A duna danki na e director di SETAR NV Sr. Roland Croes pa e contribucion cu SETAR NV ta duna na nos carnaval. SETAR NV ta un di e sponsornan importante di Aruba su carnaval y un bes mas ta musta nan compromiso pa cu cultura di Aruba.

E parada aki ta hopi esencial pa e recuperacion di Aruba su economia, e ta bay manda un señal cu Aruba ta bek na normalidad y esaki lo tin un efecto hopi positive pa cu Aruba su turismo. Pa e motibo aki nos ta keda comprometi pa e Parada Nacional Di Luz bai door y bira un exito.





# Minister Dangui Oduber: UN WEEKEND GRANDI TRAS DI LOMBA PA E RECUPERACION DI NOS TURISMO



Minister di Turismo y Salud Publico, Sr. Dangui Oduber, den luna di januari caba a anuncia Aruba su exit strategy pa por bolbe bek na normalidad. E exit strategy aki tawata hopi importante pa Aruba su recuperacion di turismo. A percursa pa flexibilisa e “inreisbeleid” pa asina por percursa asina atrae mas turista. E variante omicron tawata tin su efecto riba Aruba su turismo y a sinti esaki den luna di januari 2022. A proyecta cu pa aña 2022 lo tin un recuperacion di entre 85% pa 100% di turismo den comparacion cu aña 2019 cu tawata Aruba su miho aña den historia.

Un highlight den luna di januari 2022 sigur tawata e hecho cu no obstante un caida den turismo di cantidad di bishitante, toch a mira un recuperacion di 79% di e “tourism receipt” cu ta e indicador di mas importante pa midi calidad di turistanan. Siman pasa gobierno a tuma e decision cu Aruba ta bolbe bek na normalidad y asina elimina tur restriccion cu tawata existi. Cu esaki e focus ta pa Aruba focus riba recuperacion di turismo pa asina recupera e economia y crea oportunidadnan cu pais Aruba tin mester di dje.

Riba diasabra a yega un total di 5316 turista via nos aeropuerto di cual 4384 tabata procedente di Estados Unidos cu ta nos mercado di mas importante, sigur un diasabra grandi pa e recuperacion di nos turismo. Diadomingo tabata Celebrity Sunday caminda nos porta maritimo a celebra cu yegada di dos barco crusero di Celebrity Cruises. Tur esaki ta crea e perspectiva cu nos mester di dje. Nos ta mira tambe cu e “load



factors” nan di avionan ta subiendo y ta yegando rond di 70% caba. Aerolineanan ta manteniendo nan capacidad di asiento cu a reserva pa Aruba. Esaki sigur ta demostra e confianza cu aerolineanan tin den producto Aruba.

Minister di Turismo y Salud Publico Sr. Dangui Oduber ta satisfecho di mira un weekend caminda hopi turista a yega nos isla, sea ta via nos aeropuerto of crusero. Un weekend cu hopi trabou pa nos taxista, tour operators, restaurantnan y tiendanan.

Turismo ta keda e driver principal di nos economia.





## UN CUADRO JURIDICO NOBO Y STRUCTURA SOLIDO PA UN ECONOMIA NOBO



Simplificacion di otorgamento di permiso y un loket virtual pa tur peticion di permiso pa negoshi, ta aporta na miho “customer-service” pa comerciantenan y na e clima empresarial y di inversion di Aruba.

E leyman di otorgamento di permiso pa negoshi ta anticua, e meta di e maneho economico cual mester ta e base di e leyman aki no ta claro y sa di ta di aña 1945 y basa riba e situacion di Corsow di e tempo ey. Den proyecto 1 “Aceleracion y mehoracion di proceso di permiso” e permisionan di establecimiento di negoshi, permiso di horeca, otorgamento di tereno, permiso di construccion y permiso di estadia y trabou, lo wordo revisa y componentenan innecesario lo wordo kita. E meta di maneho di cada permiso lo wordo formula di nobo y alinecu e circunstancianan economico actual. Esaki por resulta den cambionan di ley. Criterio pa evaluacion di peticionnan di

permiso lo wordo explicita y e termino pa decision wordo tuma riba peticionnan hasi lo wordo explicita y acelera.

Minister Geoffrey Wever: “Gobierno mester crea e condicionnan pa facilita comerciantenan haci negoshi y innova”. Una vez proyecto 1 wordo finalisa, proyecto 2 “Sistema coherente di permiso tras di un loket virtual” lo cuminsa cu e proposito pa comerciantenan por pidi y haya nan permisionan cu termino claro di decision riba peticionnan hasi. E backoffices di e diferente departamentonan cu ta otorga permiso lo wordo coordina y lo wordo integra unda ta posibel.

Minister Geoffrey Wever: “Un cuadro legal nobo y un structura solido pa un economia nobo unda e comerciantenan por tin e confiansa y garantia den proceduranan concreto y transparente”.





# MINISTER ENDY CROES & MINISTER ROCCO TJON A KEDA IMPRESIONA CU E PROYECTO DI LEERORKEST



Riba un invitacion special diahuebs mainta Minister Endy Croes conhuntamente cu colega Minister di Husticia & Asuntonan Social Rocco Tjon a bishita Aruba Adventist Academy, St. Paulus Basisschool y Graf von Zinzendorf na San Nicolas en conexion cu e proyecto di Leerorkest. Den luna di februari oficialmente e lesnan di Leerorkest a cuminsa na e scolnan na San Nicolas. Leerorkest ta brinda les di musica actualmente na cinco diferente scol. E meta di leerorkest ta pa siña e muchanan toca un instrumento manera fio, cello, dwarfluit, French horn, contrabaho, drums y percussion durante ora di scol. 'Nos ta contento cu a amplia di dos scol cu tabatin den e programa pa cinco scol incluyendo Colegio Laura Wernet Paskel y Prinses Amalia Basisschool na unda tin alrededor di 400 mucha ta participando na e lesnan aki', e Mandatario a expresa. Minister Endy Croes tambe a haya e oportunidad di toca e French horn y drums.





## Continuacion MINISTER ENDY CROES & MINISTER ROCCO TJON A KEDA....

'Nos por a tuma nota di e alegria cu e programa aki ta trece pe muchanan. E ta yuda den concentracion, den coordinacion pa cu musica y e ta alegre e mucha su bida tambe', e Mandatario a expresa. Den futuro cercano nos tin e proyecto aki den plan pa despues di ora di scol pa cuminsa cu proyecto di Leerorkest den cierto districtonan na Aruba y brinda les di musica na un tarifa hopi accesibel. Tanto e Ministerio di Husticia y Asuntonan Social como Ministerio di Enseñansa ta encarga cu e proyecto aki. E Mandatario a sigui bisa; nos a papia caba cu Leerorkest y nan ta preparando caba un documento cu lo presenta na nos dentro di e lunanan nos dilanti pa wak si nos por brinda les di musica na nos hobennan den mas distrito na Aruba. Pabien na Leerorkest y tur esnan cu ta haci e bunita proyecto aki posibel







# MINISTER DI ENSEÑANSA CU BISHITA FRUCTIFERO NA UNIVERSIDAD DI ARUBA

**A elabora riba varios puntonan di interes, na unda e colaboracion y sosten di Gobierno ta di gran balor**

Diahuebs merdia Minister Endy Croes a haci bishita oficial na Universidad di Aruba. E Mandatario di Enseñansa a wordo ricibi pa miembronan di Colegio di Curatornan, drs. Angelo Brete, mr. Eugene Martis y Rector di Universidad, sra. dr. Viola Heutger. Director di Operacional di Universidad, Sr. Patrick Arens a duna Minister Endy Croes y su conseheronan un recorrido den e edificio y tambe a conta e historia di e edificio cu ainda tin e nomber di La Salle. Universidad tin mas cu 700 estudiante reparti over di cinco facultad y Academic Foundation Year. Despues di e recorrido sra. Ivetta van Veen, Manager Financiero di e instituto a duna Minister Endy Croes y delegacion un presentation amplio di e finanzas, cantidad di estudiante y facultadnan. Tambe sr. Arens a splica e ultimo desaroyo y retonan.



E Mandatraio a sigui bisa cu SISSTEM ta un programa academico cu ta wordo financia cu fondonan di Union Europeo, pero cu entrante 2023 lo mester wordo financia door di Gobierno di Aruba mes. Rector di Universidad, dr. Heutger a subraya e importancia di e sosten financiero di Gobierno di Aruba pa por logra acreditacion di dos programa den e temporada venidero. Minister Endy Croes tabatin varios pregunta di e efectonan di Covid19 riba operacion y finanzas di e instituto. Universidad di Aruba a elabora riba recorte financiero cu nan a logra di haci den e temporada dificil tras di lomba pa contribui na pais Aruba y tambe pa financia proyectonan sin cu mester haci un apelacion financiero riba Gobierno. Funcionarionan di Universidad a keda masha contento cu e bishita di e Mandatario di Enseñansa, y principalmente pe preguntanan al caso cu a wordo haci.

Minister Endy Croes tabatin hopi interes pa e programa Shoco Wellness, cu ta duna estudiante y personal di Universidad di Aruba sosten emocional y psicologico. Un programa cu Universidad di Aruba a inicia un par di aña atras y a demostra su importancia caba pa cu e sosten cu studentenan mester riba



tereno di bienestar general y salud mental. Minister Endy Croes a finalisa e atardi na Universidad di Aruba, indicando cu e ta desea di sigui mira colaboracion estrecho cu IPA. Como tambe Universidad por duna su Ministerio conseho riba temanan pa sigui mehora calidad di enseñansa na Aruba. Sigur por mira tras riba un bon bishita y tremendo reunion unda colaboracion entre partidonan y sosten di Gobierno ta di gran balor.



# MINISTER ENDY CROES A SORPRENDE FAMIA OMIRA Y RIRI BOTTA

## En conexión cu 45 año di existencia di El Gaucho Restaurant

Diahuebs atardi Minister Endy Croes a sorprende famia sra. Omira y sra. Riri Botta di El Gaucho Restaurant en conexión cu nan 45 año di existencia. Na unda cu den nomber di Gobierno di Aruba e Mandatario a haci entrega di un reconocimiento special.

'Masha danki pa kere den economia di pais Aruba y pa brinda oportunidad na nos hendenan pa por traha na e restaurant', e Mandatario a expresa. Boso a traha duro pa por a logra awe 45 aniversario. Minister Endy Croes a sigui bisa nos ta orguyoso di cada un di bosonan. Danki pa contribui grandemente na e desaroyo y economia di nos pais. E Mandatario a agrega cu tin algo cu ta conecta nos, esta deporte sr. Angel Botta tata di sra. Omira y sra. Riri Botta ta un gran futbolista. Mi tabata traha di serca cu sr. Ramon Lee tempo nos construi e 'technical center' na Noord cu a hiba e nomber di Angel Botta. Un momento hopi importante sigur, na unda a recorda y repasa e bunita historia di El Gaucho Restaurant Aruba, emocionnan sigur a domina di recorda tur esfuerso y dedicacion di famia Botta durante un trayectoria gigantesco den e mundo di Restaurant pa Aruba. Sra. Omira Botta a gradici e Mandatario pe sorpresa ameno



y agradabel. 'Nos ta aprecia presencia y atencion di Minister Endy Croes pa cu nos, nos no a spera esaki', sra Botta a expresa. El Gaucho restaurant a kere den Aruba, nos a sigui dilanti apesar di tur problema. Ohala Dios duna nos forza y otro generacion hopi año mas pa por sigui. Masha pabien na e famia grandi di El Gaucho Restaurant.

# NOS A DIALOGA CU REPRESENTANTE PERMANENTE DI REINO NA NEW YORK PA NACIONNAN UNI, SRA. JOKE BRANDT

## Riba e oportunidadnan cu por ofrece Aruba riba diferente tereno

Recientemente durante un encuentro ameno na Museo Arqueologico Nacional Aruba Minister Endy Croes a cera conoci cu sra. Joke Brandt kende ta Representante Permanente di Reino Hulandes na New York pa Nacionnan Uni. Durante e evento sra. Brandt y delegacion di embahada di Reino na New York por mira e presentacionnan nos artistanan local y tabatin e oportunidad pa combersa cu nan. E anochi tabata den e tema di arte y genero. Minister Endy Croes a agrega cu nos tur a keda hopi impresiona y encanta cu e presentacionnan.

E Mandatario a sigui bisa cu mester remarca cu ta pa prome biaha cu un representante di Reino Hulandes na New York pa Nacionnan Uni a bin Aruba pa conoce nos dushi pais personalmente y asina haya un miho idea di e retonan y con por yuda Aruba pa realisa un desaroyo positivo pa nos pais. E Mandatario a sigui bisa cu nos a enfoca riba e importancia di e relacion cu Reino y Nacionnan Uni como tambe a delibera riba e formanan cu e por yuda nos cu proyectonan cu Nacionnan Uni.







Minister Glenbert F. Croes: E di 3 grupo a completa e curso di Mindset Reset. Un inversion personal pa empodera nos hendenan logra un miho perspectiva pa nan mes. Nos ta sumamente orguyoso di cada un cu a participa pasobra nan a demostra determinacion pa logra e miho pa nan mes.







NO KEDA WARD PA OPORTUNIDADNAN YEGA NA BO.

LANTA Y CREA E CAMINDA DI OPORTUNIDAD BO DILANTI Y

LAGA ATRAS EFECTONAN POSITIVO PA OTRO SIGUI BO TRAS.

*Feliz Siman!*